

James huua ashammaléaxxiia axpílupeesh ala kuss baawaalaátdeehcheesh hinné koók

1 “Shóotaachi?” hek James.
Ashammaléaxxiia axpílupeesh awé kootáa kuluchísheesh díilussee “Shóotaachi?” baak. James huush bíik. Akbaatatdía dak deéla Baxxiilaatúuash Jesus Christ ishkawáasuush ko bii hawák. Hinné biiléen baawalaáchik.

ala chiwakáau dak bale baa éhche dak

²⁻³Bakúpkaateen hinné kal élahkuuk. An baa dáhkalattuuash ii dii chilasshihtúulak dalásatchutuulak an díhkualaassuua áxpíhcheihmaachik. Heem baa baalúlaahuulahtaa ii xawaáhnessaak baalíhkammaataalah.

⁴Ii kootéesh an baa dáhkalattuuash ammaa díaluush ii díhkualaassuulak háaksee al ii dii bilaxpáaktaahiluush al ii baa élahkuush ii an díluush chichútdaak baa ákkuumnuulak kal ii ihée ammaa dakúuwuuleetiimaachik.

⁵Dii sapéolahtaa baa ámmaalaaxtuulak ii bale baa dassihché ítchikaateesh Akbaatatdía kuss dakáaluulak ak baa kuxshikaásheesh koók. Ii kootéesh baa chishíassaa ísshialitdeettaa iixaxúa díakuuwiash koók.

⁶Baa dakáaluulak an baa dáhkalatchekaasuush dak an dalásduupassaakaasuush dak kala ko ii díaluulak koók.

Heehataa dalásdiiwaaheelaaluulak huché hiisáat binnaxxiché ii hawass dakkáhpak áaahkuiluash ko kan dii kala kootíohmaachik. ⁷⁻⁸Hileen bilaxpáakuum baa an día xaxúa daásduupak daásbaaheelaaluash baa an bíawaalichissuum baa an díoo xaxúa annawíssuuk. Heem “Akbaatatdía baam bakúihmaachik.” hiliachissuulak koók.

an baatcheeshkáate dak an baatcheeshíssee dak

⁹Bakúpeem cheéshdaak háakkaashkaatahtaa Akbaatatdía an báaxxiash kalako ii baa ihkammáachiish daatdak koók. ¹⁰Heehataa ak dahísseem Akbaatatdía ala cheéshde aahíilak ii daásitchiish daachik. Ii kootéesh iiaxúash dak baa éesh dak baaapáalikisshe haawíluash ko kala kootíohmaachik. Baa ii baa koochihtúuleetak. ¹¹Kooták. Baaptatchée áxxaashe asiit taweekaaséet hinna awé áake bikkée dak baaapáalikisshe dak chóosak haawíluash ak dahíssaak baa ala kúumneettaahinnahtaa ko kala kootíohmaachik. An bilaxpáakeesh ii baa koochihtássaaihmaachik. Ammaa hiléesh díalahkak kalakoon al akúkaa húuleettaa saáhnak ammaa isítcheesh dak ammaa íhchish déesh dak kuk it baakoon kaáohmaachik.

**an baa chúuss baáu dak an balee baa
kxawíannahchewioo dak**

¹²Akchiwakíiam baa baalúuahaatchelak daasátchutak baa chúuss daáhnahtaa baakoon kootáa ihkúalaassaak Akbaatatdía al íkeesh baa annawíiak koowéessaataahinnak ii al ítcheesh híihmaachik. Hilaakée an daásitche ishóochissee iisássee awé áakeen an bilaxpáakeesh uhpé hiilák an baa kulutchéesh bakáleesh baa baatcháachkaasheesh an daásitchikaasheesh koóohmaachik. Kan baa chilakkaták baa ákkuuwiiak an bilaxpáakeesh kuk kal ii baa koochihták. Akbaatatdía ak íchissheesh kal ammaa díawilikkuuwiash koók. ¹³Baa kxawíiam díalaawialuulak “Akbaatatdía kon bii koochéehchek.” hessaataahilalah. Akbaatatdía kuk baa al iháateesh baa ala kxawíash kuk díassaaik. Haak bilaxpáakee dasshíissaa koochéehchewiassaak. ¹⁴Heem sapéelahtaa ala kxawíia daasíiak díalak kuk kal ílala iiaxúa díak. Bilaxpáakeem baa al iháate ko dasshihalaaták

kootáa baa ilusshítdeetdak kuk kal íltaa kxawíwiak.

¹⁵Heelak baa iháatdialaawialaakaulak kala shíassaa baa kxawíilialaaloohmaachik. Ammaa kxawíilialuaa áxpihkaalawe aa ko ii bale shéesh ko kan díiskussaalohmaachik.

Akbaatatdía baa ala kootáhchewia

¹⁶Bakúpawachissheen an díhkaxshileettaak díhchi kúahchessaalah. ¹⁷An dii baa íluuak ammaa al ítchikaasuum koochihtëesh an dákuuash baatách xaxúa báakukkoko ammuússaa duúok. Báakukkoon ammaa ala kooléesh Baksáau Akbaatatdía kon díash ihkulussáalaaliiluk. Akbaatatdía iiaxuataáhileesh ala kulusshíleetak iláaxaxxeeleetak ii chihpashíhkaak kuk kal ii baa koochihták. ¹⁸Kal ílaataahilia daasé díak al ilíia ala koottáhileesh kalako ii kaka balee bishíhchek. Awé áakeen bilaxpáakeesh shíishiaahe ahúhtaa al íkee balee bassáhkaak bíluchihk áa baleiichiweeítcheesh biikukkúulak hiliachik.

Al ilíia biikukkák díawuulak koók.

¹⁹⁻²⁰Bakúpawachissheen hinné éhkaak kalaaxtássaalah. Bilaxpáake alataáwihaattaak daásbahtalak kuk baa tátchikaatbialak Akbaatatdía an balee baa díahcheesh díawialak alínneetak. Heem díishooulahtaa baa an díikukkuua ko bassáhkaak díluchihk áa dilíwiassaalah. Baa saapbiipdahtaa ii dalásbahtassaalah. An diláau íassiaalah. ²¹Heem hinna íwahkoooteesh kalako ii an dii baa ashítcheesh dak an dii ala kxawáaush dak ii díhchi kxawíikaashdaawialuuash dak xaxúa déehkaalah. Heelak cheéshdaak Akbaatatdía al ilíiitchikaashim dalásuua awúuan dúusaash dilúttuulak kalako ii dii iléewiook.

²²⁻²⁴Sapéelahtaa hinna baleiichiweeítcheesh iikukkák ala shííosh díassaalak iiwaleihchichíikeem koon iisé kuss íkaak ítchikaattaa koon ihchichíkaak kalakoon iikussáak déelak ihch ala kootéesh kalaaxtéelak ko kala kootchichéek. Heem hinna baleiichiweeítcheesh ittákkaa díikukkussalah. Koótduulak díhchi kúaluuk. Itchihk baa ala shéesh díassaassaa díataahilakaalah. ²⁵Hinna baleilíiaakaxpissaam Jesus bíilussee óosh ii balee kulusták an balee bilaxpáakeesh an bihch ala hawassáawuuash ii balee baáliliik.

Bilaxpáakeem Akbaatatdía ala koottáhileesh ko kuss íkaak chilasshihchikaásak datchítdessaalak kalako ii baa sáapannia Akbaatatdía kuk baa áatchinnaachihcheihmaachik.

²⁶Kal ílala sapéelaht “Bii akchiwakíik.” hewialak kootáa déeshe dúuxaashbialak baaleetdak baa al ilíiwishdatchilak báheelia ihchi kúak. Ala chiwakíia awuúleetak. ²⁷Baksáau Akbaatatdía ishóocheen an dáhchiwakaauash baa hoowikáattaak koottáhilihcheesh hinné koók. Akbíassheesh dak baaaksáaleetkaateesh dak an dahúua an baalilísuuash al alákaalakuuash díaalah. Hinna awé áakeen baa ala kxawíia ii bilaxpáake ihchi baa ashíttuuash diiluk kooxiíssaalah.

Bilaxpáake xaxúa bach íkuxxaawahchewiilush daachik.

2 Bakúpkaateen Baxxiilaatúuash Jesus Christ an baatcháachim ak kalátchekaasheesh duulak bilaxpáake bach íkuxxaalahkuulak koók. ²Bachéem dahíssaalak ischássasshe úuwatshiinniak ihkulutchíwaatchaachiik annáhchiwakaauasheesh biléelihuulak haak bacheé ihéem cheeshdák is baaaxúasse xexawáak kúh biléennak shóotduuk hée? ³Hinna hawátam ihkulutchikaásheesh dahchikittaáhak kuss hilífasheeluulak “Huúh. Hinna balealawáache ítchik. Ko koolíah.” daak díikussaak hinna bacheé hawáteesh kuk kuss hilífasheeluulak “Díilaa éhkoon díluu xuh ammaa al ámnaatbialaalak huuák aláasho bachanmishéen awáachih.” hée? ⁴Kan bale alataawíssaam díalaak. Dakúpe dak diilaxúoo dak díhchi bach íkuxxaahchessaak hám ittáak hám kootássaak diliatuuk. Koótduulak bale iláaum páttuuash ii baa iháatduuash ko ii baa dáhchilasshihtuuk. ⁵Diikukkáhaalalah bakúpawachissheen. Akbaakalátcheleete héeluuan bilaxpáakuum baatcheeshkáatahkuulahtaa Akbaatatdía kon kalátchekaashihkaak anmaahawasséesh an baaláhkawishihcheihmaachik. Ak íchissheesh xaxúa kuss al ihchi baa ímmitee kootáakuuwiam élahkuuk. ⁶Heehtaa baa baatcheeshkáateesh díilaa batchooléelahkaak dilúpiak xawíluuk. Baa baatcheeshíssee ko sápdahkuuk. Deéla ittákkaa ii dii baa hilaatúuk. Hileen baa baatcheeshíssee akbaachilasshíhche ishóotuaa ak dii aalífoosh koóm kúh élahchetaahiluuk. ⁷Deéla hinné élahchekaasuuk. Jesus Christ

ak dii eé dáashe ítcheesh ii dii xíassaalituuash ko bilaxpáake kuk ak baaík shíío sheehilák ak ii ilífxawiikaassaak dáasheetaa ii al ilíiwisuuk.

⁸Deéla Baawaalaátbaaxpéesh awúuan bale baa íkuchkeesh ala shíío “An díhch aláchissheesh aláxpíilaasshiia kúh kootáakuuh.” huuash dáhkalattaak díaluulak kal annámnuuk. ⁹Heehtaa baa dahísseesh kuk díalaaitchilaak baa baatcheeshkáateesh kuk koótdaassuulak kan baa kxawíannialaak Akbaatatdía al ilíiash hiliínnaak díalaassuum Baleilíiaakaxpisseesh an baalaátuuash ii xíassaak. ¹⁰Kooták. Dii sapéelahtaa Baleilíiaakaxpisseesh xaxúa díalaalahtaa Akbaatatdía ammaa íkuchkeesh hawátkaatdahtaa “Hinné kuk alátdeetak díawaassaawiik.” diliatak dilússhisheesh kuk kala koochihtáa dilússhisdak ko íkuxxak. ¹¹Kooták. Akbaatatdía koóm hilíasheesh buh. “Bach kataalíssaalah.” haak kúh “Bilitchilappeéssaalah.” hek. Bat dáhkatdaalissuulahtaa bilaxpáakeem dáappiolak hinna Baleilíiaakaxpisseesh kan dilússhisuuk. ¹²⁻¹³Shóon Akbaatatdía baa chilassihchilák hileen ak baa chilaschíleeteesh kúh chilaschíssaataahilak sheekaalíhmaachik. Heehtaa ak baa chilaschéesh kuk ammaa chiláauleetak. Heem díluhkan Jesus Christ ammaa íkuchkam is bilaxpáake bilikkúuash baa ala kxawíanniawuuash koon ii balee kuluschéesh balee an díahche ii díawaawiawuuash chichéhkaakaalah. Ko ii dii chilassihchíohmaachik. Heem baatách xaxúa an diláaush dak an daxátaash dak ítchiluulak koók.

An baa kaláttuum an baa hínneeteesh shéek.

¹⁴Bakúpkaaten hawátem “Bik baa bahkalátchek.” helitdelelaak kootáa baa ítcheewiassaalak kuk ko bale baa kalátche ii ilíssaaihmaachik. ¹⁵Deéla dakúpeem baaaxúassee xawáak ammaa an duusaátdeetak ¹⁶kootáa dii héeluuan kuss hilíasheelak “Dáah. Itche dahkúh. Hilísh dii baa áatchilak dii tawéekaatak díś óossheewishiih.” helak shóohtaa ítchik hée? baa ala kúuweesh dákuusuulak kuk an dáhkuxsuuleetak. ¹⁷Heem bale baa kalátcheesh kuttát díalaak baa dáhkuxshissuulak baa hámneetak.

¹⁸Deéla sapéelahtaa díśś hilíasheehmaachik. “Bale baa kalátcheesh díalaak. Heehtaa bik bale baa kuxshéesh

díawaak. Diah “Baa bahkalátchek.” dee bii óowiih. Bii íkaalahchewialaalak anneéleetak. Heehtaa ammaa díaweesh ii an baa bahkalátcheesh dii íkaawahchewiik.”
¹⁹Haak Akbaatatdía hawátkaateesh kuk dáhkalatckek. Kootdák ítchik. Baleiláaxxawiia koóuhtaa kúh kaláttuum chiláau ii tannaakaáuk. ²⁰Baa dáhkalatckek kuttátdak baa dáhkuuxshissaalak baa hámneetak. Baa éhcheleetaa íwak díss xíassaakaashbaalak diliachi? Kootdák hinné díikukkuh. ²¹Bas baaxaalíoo akúkussahke Abraham hua Akbaatatdía al ilíia ko díam dáakbacheesh Isaac aaléela kan dappeewíak Akbaatatdía kuuwíak buh. An baa kalátckekaashe kal ii xíassaak. Akbaatatdía ammaa díahcheesh díawiash kalako ii ihchikitchéek huuk. ²²Heem kal alákuu? An baa kalátckeeesh dak ala xachíiash dak an baa hiléesh xaxúa díam an baa kalátckeeesh koochihté kal ii xíassaak. ²³Heem kal ii íwahkoocheesh kalakoon Baawaalaáchim Baaxpéesh ammaa ala shííosh Abraham Akbaatatdía kalátckekaashdassheen Akbaatatdía hilíasheek. “Hinna Abraham bilaxpáaktaahilik.” hek. Deéla ii iláaut “Akbaatatdía iilápaacheesh koók.” heiluk. ²⁴Heem alákuu? Bilaxpáakeem an baa kalátckek dak an baa hiléesh bach áappaa xachíihchelak kala koók. Akbaatatdía al íkee ii ak ihchikitchéek. Kal ii ilúuash bale baa kalátckeeesh kuttáchissaa. ²⁵Kúh bíam akihchiiwaalútcheesh Rehab huuash koóhtaa Akbaatatdía kulustakuúhcheesh kúh ii baa xíassaak. Ii ilíhkaakuuash an baa kalátckeeesh kuttách ii díassaak. Ala xachíiash áappeem ii kootéesh koók. Jewish ak chíitduum aaxuakuuák kuksák iháahtaa kaláahckek buh. Kalako ii ihchikitchéek huuk. ²⁶Heem baa bahkaláttuulahtaa baa bahkuuxshíssuulak balee baa hámneetak. Balee axúa kuk it koónnahtaa balíahuua haamnák baasúulak ko kala koottáahilik.

An baláau al ii baa kxawíianniawuuu hawák.


3 Bakúpkaateen dii kooshtakáate kuttách ak baa baachimmíhchelewialaaliilush daachik. Kuk kal élahkuuhtaa kala chii sheewáawiik. Ak baa baachimmíhcheesh ak baa baáliliash Akbaatatdía an balee chilassihchéesh biiluk baaluukaassaáhihhaachik. Heehtaa bilaxpáake hawéeseesh kuk kootássaahmaachik.

²Bilaxpáakeem déeshe dúuxaasak al ilfiash ii baa iáxxohchessaalak bilaxpáaktaahilim ii kooták. Haak an bilaxpáakeesh dak axúa kootáa dak baatách ii ihch íasseewialak kooták. Heehtaa biixaxúa baa iháate ahníawaailuk buh. ³Hinné élahkuuk. Iichiile íaxchuwate kussáawuut kukkan an déewahchewiwuua balasanníawuua díawaailuk. ⁴Hinné kúh dasshihtáalah. Báashee isáatkaasuuahtaa huché hiisáat kal ii dée koók. Heehtaa iichilakeé iakaáshkaatahtaa ak chilakéesh shóoss déehchewiat kooták.

⁵Deéla balee déeshe kúh kala kootúuk. Balee axúa ala kuss dakoóshia iakaáshkaatahtaa ii balíiwaatchaatbaailuk.

Haak hinné dasshihtáalah. Biláaxahche iakaáshkaatahtaa ii alápeet baatcháachiiluk. ⁶Balee déeshe kúh bilée ko kala

kooták. Ammaa ala sheewúuash ii batshúawewiwuulak kootíihmaachik. Hileen balee déeshe ii baa kxawíikaashbaak ii baa haawitáahinmaailuash Bilé Isée al aláxiia ko kala kooták. Balee déeshe ii balee baa kxawíikaasshehchewialak kooták. ⁷Hinna awé áakeen baaaxuwishí dak dakáaka dak íaxassaa dak binmuunmaakoolá dak shíishiaahe xaxúa bilaxpáake dúttak ilísshitchiiak baaliíttammewioolak kootúuk. Haak kala kootúuwishik. ⁸Heehtaa díishoolahtaa daléeshe xachíissaassaak batshúak dís dáatdaawialaalak ilísshitchilawialaalak baaliíttamnaawialaalak baaleetiihmaachik. Kooták. Balee déeshe cheétiiluskuoo ílutchikak ii baa saáhiiluk. ⁹⁻¹⁰Bakúpkaateen hinné balee íia koon an baláaush al iikuschéesh hawátkaatak. Akbaatatdía kusséesh ii “Ahóoh.” baak kúh ii baa sheewaakaalúuk. Kooták. Balee déeshe ii Baxxiilaatúum Baksáau Akbaatatdía kóosh dáshe báaxxiwaak



James 3.4

kusséesh “Ahóoh.” baailuk. Kootáa hileen bilaxpáake ii sheewaakaalúukoolak íwahkootbaailuk. Akbaatatdía bilaxpáakeesh díak ihch ala kootéesh kootúulak hiliachik. Bakúpeen hilíatbaassaataahinmiiilush daachik. ¹¹Deéla biléem ítchikaatdak haak bilé xóoseem bach áappaa bahée hawáteem koon poopshiiáatak iikuschíssaaihmaachik. ¹²Ikaak bakúpkaateen buluhpashipítkaate (olives) balapáale ihéem koon apáalissaaihmaachik. Haak buluxpéem kúh daxpitcheeishtásshe koon apáanmioolak baaleetiihmaachik. Bilixóoseem dilúttak baawiish ítchilak diliatuulak ko kala koottáhilik.

báakukkoon baa ala koottáhile

¹³Dii héeluaa hám ak baa daasaxchiikaasáak ak baa dasshihché sapéelak kal ii élahkuuash hinnéek. An bilaxpáakeesh ala xachíash al ítchiio ii xíassaahchek. Cheéshdaak baa kuksák baa daásdeeak baa al éhcheesh ii baa baálilaaauk. ¹⁴Heehta baa aliáhaahikaasuulak díilaa dalásalakoottaahileesh ko díalaawialaalakaaulak baa deétalachissuulak “Bik baa éwahchek.” hessaak ii dilíiwaaileetassaak díhch iiláxiassaalah. Koótduulak ak cheéshdessaa dii biíssuuk. ¹⁵Bale baa dasshihché íwahkootéesh Akbaatatdía baaláhkassaak. Ak baa dasshihché kooté hinna awé áakeen ammaa ala kootéesh baa al iháattuuash ala kootúuash koóuk. Chíisbishe an baa hiléesh koóuk. ¹⁶Bilaxpáake baa iáhaahak baa ishóoche ko dáak baa eétichissheesh bach ilíitaak bat balúookoolak baa ala kxawíianniookoolak hilíatuuash ii baa ítchiliooletak. Kooták. Baa an baawachílapee dak baa ala kxawíia dak baa al iháate dak xaxúa shíishiaahe koolák. ¹⁷Heehta hinna bale baa dasshihchím báakukko koon biíluss húuhcheesh kuttách ii díawuulak koochihk balee hoowikáatak balee baa ashítdeetak baa balásdeeak baannátchiiwessaak baa baláschiaxxapak balee chitchísseetak éhkoon baam ii iláaulak xaxúa biikukkák al ítcheesh ko díawaawakuuk. Baa balásdeeak bilaxpáakeesh xaxúa bahkuksák éhkoon bilaxpáakhawatkaatdak kuttát sápbahchessaak baa ala kootéesh ko díawaak baa annámmuuk. ¹⁸Ak baa daáschiaxxape an baa kuksúua bilaxpáake íkuulak kal ii

ammaa hilúum ítcheesh áxpíhkaalawíohmaachik. Kootáa baa annawéewiaohmaachik.

Akbaatatdía díhchi kuuáalah.

4 Hileen ammaa iháatum ítchilaawialaailuhtaa kootáa dalásbahtak baa annawísseesh ko díalaalissuuk. Iwak ii dii héeluuash bale bat balúuash hámmisak bale bach ilíichewisuuk. Kúmamaam baa kxawíia an díalaawialee ii dii baluúolak ko kala kooták. ²Deéla ammaa deewiáluuash baaleetam kan baam daappiiáhmiialaak haak baa alóolituulak kalakoon ii baa alaachiahéewialaalom baaleetam kan díin bach kussáaush bach ilíitdaalaakaak bat dáawaluaalahkak íwahkootduuk. Akbaatatdía kuss baa dakáalissuum hileen ammaa deewiáluuash baaleetihmaachik. ³Deéla baa dakáaluulahtaa dákussuuk. Ii kootéesh dakuulak báheelia baa baaleete dak díinnaxuoo baa an disítchiluaa dak ko ii díalaak kootáa baa ihée aláxpak ii díalaassaalohmaachim ko ii dákussuuk. ⁴“Akbaatatdía awáchissíhik.” duuhtaa bíoom bach kataalíluuash ko kan dii kala kootúuk. Kootáa awé áakeen ammaa ala kooléesh dak Akbaatatdía dak dúupta bach kuxxáalahchewialuulak aláchissíhiwialuulak baaleetihmaachim élahchekaasuuk. Eehkoon hawáteem ílilaa daasé díak awé áakeen ammaa ala kooléesh dak bilaxpáakbatshua dak ko bassáhchelak kuk Akbaatatdía kal is koochíiak. ⁵Akbaatatdía al ilíia an baalaátuaa hilíashiik. “Akbaatatdía baleiláaxam balee axúasseesh kooíiash ii íasseek.” huuk. Hinna al ilíia koottáahilik. Iisalakusseé élahchekaashik. Heem íwahkootéesh kan baa hámnéetdahkuu? ⁶Heehtaa balee baa anníihiissaaht Akbaatatdía baa al ítcheesh kuk balee ishóocheeta ilúxalaa dúushiiash baatchaatáak áxpíhkaalawik. Ko ii Baawaaláachim Baaxpéesh hilíashiik.

“Bilaxpáakuum baatcháatdewioosh kuk

Akbaatatdía isítchissaak iichúulaalaachik.

Hawátuum ak cheéshdeesh ko íkaakuuk.”

⁷Heem cheéshdaak Akbaatatdía dalásuuash kuuák ammaa dii díahcheesh díalah. Heelak ak baa kxawíiash Chíisbishe iichúuluulak dii íhchish kaláaihmaachik. ⁸Akbaatatdía díhchi kooxiiáalah. Heelak íh dii koosáhtakaattaalakuohmaachik. Heelak ak baa kxawíiannialeesh dístuaa íssíhiwak kan

baa kxawíiliassaalah. Haak dalásuua hoowikáattaalah. Awé áake ammaa ala kooléesh dasshihtakaássaalah. Kan daláshawattaalah. ⁹Deéla baa ala kxawíiannialuuash ii daáxawaak chíaxak dístamnuuash húuhkaalah. Kaássaa chíaxaalah. Dalásitchissaa baalíhkammaachissaa daláxawiikaasaalah. ¹⁰Iwahkootaak Baxxiilaatúuash ishóocheen ala cheéshdaak díhch awáxiikaalah. Heelak ílaalahtaa dii báaxxiiohmaachim an dii íkuua dii baatcháachiohmaachik.

Bat chilassihchíssaalah.

¹¹Ikaak bakúpkaateen bat al ilíiwisak bat chilassihchíssaalah. Haak ak íwahkoocheesh kúh baleilíiaakaxpisee kala ko baa aahiiák baa ala shéesh iichúulek. Baleilíiaakaxpiseesh dáhchilasshihtuulak kal áatche baa dífalaak ii dífalaassuuk. ¹²Heeht Akbaatatdía baleilíiaakaxpiseesh ak bilikkúuash ii ak balee chilassihchéesh kuttáchkaatak. Deéla balee ilée xuh bilée isée balee héelass shítak ak daasanníaliash kuttáchik. Hehtaa diiluk dakúpuaa an dáhchilasshihtúua dii baaláhkassuuk.

Chilaákshilak an baa díawaawiwuua ii balíiwaaileetassuulak koók.

¹³“Kuhée” ak hilíasheesh “Hinna baapé koó xuh chilaákshilak awaasúualahoom bífak koon bakaáu báalaahawataatbaawuuk. Koon baa ii baa awíaschilak bálee ahóom díawaawiwuuk.” duuk. ¹⁴Ikaak chilaákshilak an dii bilaxpáakuua shóotbialak kootáa dáalaaxtataahiluuk. Sáapa? an dii bilaxpáakuua. Eehkoon awashiíam huuáhak shíassaa haawaáhiiluash ko kala koottáahilik. ¹⁵Baaleettaa hilíasheelaaliilush daachik. “Akbaatatdía daasalakooté kooták koottanáak it balee bilaxpaakéelak kala hilaa baa díawaawohmaachik.” daaliilush daachik. ¹⁶Koótdaaliilush daachihtaa baaleettaa dalásduupassaa baa díkuchkak “Bii baatcháachik.” daak dilíiwaaisaaluuk. Al ihch iiláxiia kootéesh kxawíik. ¹⁷Heem bilaxpáakeem baa annawéeish daatdak éhkaak kootáa it díassaalak kuk kan baa kxawíihilik.

bilaxpáakdahissee

5 Bilaxpáakdahissee bii díikukkaalah. Díiwaahak dilísaahaalah. Kala shíassaa dalásuua xawíikaashiohmaachik. ²Baa al ii dii dahíssuuash haaták haawíihmaachik. Baalaxuásseeom ítchikissheesh baapúxte kúh duushíohmaachik. ³Dís úuwatshiile dak dís úuwatchia dak kala kootáa íschiwisak kaáuk. Kootáa kan duusaachík. Akbaatatdía dii chilassihchilák ko an duusaachéesh íkaalak ii dii eéssaohmaachik. Hinna an duusaachéesh bilée ko kala kootám daxúoo ii aláxaak ii dii baa haawáaheehmaachik. Baapiiháake kala hiitáahilihtaa it an baa daáu ahkaásheesh áxpilahkuuk. ⁴Kooták. Dís datsáau ak koon baa hilúum íiwishdialaaliilush daatahtaa it íiwishdialaassuuk. Díikukkaalah. Is baa íiwishdálaassuum ilísaahaak dii baa aaliólak ko kala kooták. Kooták. Ak baa hiléesh baa bakáaaattuuash Baxxiilaatúuash Akbaatatdía baatách xaxúa hawasséesh kal iikukkák bakálee dii díaohmaachik. ⁵Hinna awé áakeen an dii bilaxpáakuuash daásittak baatách ii akítchiluuk. An díalaawialuuat díailuk. Bishéechiile éehkoon baa duúshitchiik ilápkaasak kaálot dappiiáhiiluash ko kan dii kala kootíohmaachik. ⁶Deéla hawátuum baa aalaliíosh alattúuleetak ammaa iháatdiooleetak dii iichúulessuuk. Kootáa dii ditcheeshéessuahtaa sheelakáalak dáappiiaahak baa hámneetdahkuuk.

Dalásatchutak baa iwaachíssaassaalah.

⁷Bakúpkaateen diiluk íwahkootdaassuuk. Dalásuuash chichúchihkaak baa óolak kaáu aa Baxxiilaatúuash chishíihmaachik. Ikaak akbaawuússeesh koóum basáan xaleé dak bíawakussaan xaleé dak óolak daasátchuchiiluk. Koottalát kan baatách óosak ammaa awuússiiosh kúh kal alakuhké kan dífak íttuuk. ⁸Díiluh dalásuuash chichúchihkaak dalásatchutaalah. Dúhpupeelesaak baakoon káalah. Baxxiilaatúuash baapalachishíwiash kal áhtakaatak. ⁹Bakúpkaateen bat baaík shiiáhissaalah. Koótduulak Akbaatatdía ii dii chilassihchíohmaachik. Díikukkaalah. Akbaachilassihchéesh kan balee hiitáahilim eek bilía koon iluuák daatdák ko kala kooták. ¹⁰Bakúpkaateen

hileen Akbaatatdía ammaaihchiláakuuhcheesh ala xatáau dasshihtáalah. Dáashe dáasaasaattuum baaík ii baailísaahuuhtaa kootáa daasátchuchihkuuash ko ii baa xíassaak. Díiluh ko kootáalah. ¹¹ Akbaatatdía is bilaxpáake ahóom éhkoon baatách ii baailísaak áaahkuuhtaa baakoon dasshihchísseetak kaáuk. Ii an basshihtúuash hilíatuut “Baa áatchilakaailuk.” baailuk. Ikaak Job huuash díikukkuwisuuk. Baa chúuss dée baatcháachihtaa daasátchuchim Akbaatatdía daasé ítchikaassaakuuk. Heem Akbaatatdía an baa íchisheesh dak an baa daásdeekaasheesh dak ko ii xíassaakaasshek. Ko koótewialuulak kala koók.

al ihchi baa ímmitee

¹² Kal íwahkootak bakúpkaateen díikukkukchiiaalah. Kala hinnéek. Eehkoon “Eeh.” daahuulak díaalah. Haak kúh “Baaleetak.” daahuulak díassaalah. Bilaxpáaktaahinnaalah. Kala shóotdaa shóotdahtaa ammaa sheelúuash awé dak Baaiiwaakoochihtéesh dak baa ihée sáapdahtaa kusséesh ii díhchi baa ímmítiaaahkussaalah. Koótduulak Akbaatatdía kon dii eéssaahmaachik.

Akbaatatdía an bahchiwakáau iikukkúk.

¹³ Deéla dii héeluaa hám baalilísuulak dáhchiwakaaaulak koók. Haak dii héeluaa hám dalásittuulak chiwakáauwalaxak Akbaatatdía dáashe báaxxiiaalah. ¹⁴ Haak hawáteem baakuhpáalák akchiwakíialaxuahcheesh is akchiwakáaum baaisáateesh iláak ihchi chiwakáakuuhkaak taláawaaxpeesh ihch ii díakuuhkaak Baxxiilaatúuash dáashe dáasaashihchelak koók. ¹⁵ Baxxiilaatúuash ammaa kaalúuash díawíash kaláttaak daasúua díakaasuulak ak baakuhpéesh isaannéesh óochiaihmaachik. Haak baa kxawíiannialak kúh Baxxiilaatúuash kalaaxtakuíhmaachik. ¹⁶ Hinna íwahkootéesh kalako ii baa ala kxawíiannialuuash bat chiwaáahkak bat chiwakáakuuaalah. Heelak an baalilísuuash ii óochiaohmaachik.

Bilaxpáaktaahile ala chiwakáaush baatcháatak ii baa kootkaáshe koók.

¹⁷ Hinné dasshihtáalah. Elijah huuash an bilaxpáakeesh an balee ala kootéesh kúh ko kala kooták. Heehtaa

chiwakíikaasak “Akbaatatdíakaataa xalaáhchessaah.” hek. Kalako ii aa báalee ii shoopé chússeesh xalaáleetak buh. ¹⁸Deéla kala chii chiwakáak xalaakaalím xaleé baatcháatak awé baa apáaleesh íttak íwahkootak. Heem díluh dalásuua díalaakaasak Akbaatatdía kuss baam dakáaluulak díalakuohmaachik.

dakúpe al ii ihchichéhchehkuuash

¹⁹Bakúpkaateen hawátem baa ala koottáhileesh píisshe déessaa iháass déelak dii héeluuan hawátem dáak aachishíilak ²⁰hinné éhkaalah. Hawátem hinna ak baa kxawíhilim koowéehkaak aachishíilak Bilée Isée koon kulustakuúihmaachik. Heem hinna ammaa iléesh ammaa ala kxawíhile ahkaásheesh kalaaxtakuúohmaachik.